

Tiemersma yn it Grouster Leechlân biwenne troch H. J. Miedema

Oan'e dyk troch it Grouster leechlân fynt men as min nei Wergea as Warten rydt in reed dy't nei it Tiemersmar giet. „Hwat wie dat altyd in moai marke”, tocht ik, „ek der haw ik faek as bern yn de snylwallen socht nei einaeijen, reidhintsjes en merkolaeijen”.

Yn myn forbylding seach ik dit alles noch ris werom, ek yn'e simmer gongen wy der hinne om de frucht fan de lisdodde huer't wy barchjes fan makken. Yn ús berneeagen wie it Tiemersmär moai!

Ik seach der nou in auto weikommen fan de „gemeentereiniging” dy't nou it Tiemersmar brûkt as stoartplak foar alle ôffal. Ik bin d'r mar net hinnegien, om ris to sjen hoe of it nou is, dat wist ik: it Tiemersmarke hat ôfdien. Lokkich wie it mei „Tiemersma”, de pleats dy der tichte by stiet noch oars. Dy stie der eigentlik noch krekt allyk as foar 60 jier werom. Noch de selde kop-hals-romppleats, de finsters meije hwat oars wêze, der is in kajútsje boppe de keamer bout, de opfeart is der net mear, mar oars hjir gjin foroaring. Allinne oare biwenners.

Doe't ik by de foargevel lâns gong seach ik dêr noch de selde stien fan alear mei it opskrift: Goaitze H. Nijdam heeft den eersten steen gelegd den 25 maart 1869.

De boer wie yn'e finne aan it boskmeanen hwer 't ik him opsocht om oer myn boadskip to praten. It wie dochs hast middei en derom is de hear Miedema mei my gongen en hawwe wy it hwat oer „Tiemersma” hawn.

„Dizze pleats hie foarhinne in minne namme”, sei ik tsjin de hear Miedema, „binammen in pear stikken lân dy't tsjin myn heit syn pleats oanleinen wienen net bést”. De boer dy't der doe wenne, Gerben van Essen, plachte to sizzen dat der fjûr under de seadde siet. It moast altyd reine oars waerd it read.

„Dat is wier”, andere Miedema, „dat wie ek sa doe't wy hjir kammen, mar dat is nou foarby. It lân is oer de kop helle, mei bulldozers flak skout, it is „freest” wurden, is apart bidonge, der is gâns „skomierde” brûkt en nou is it goed lân wurden”.

Tiemersma is in pleats fan 24 ha. It lân leit aan ien kavel by it hûs en der wurde 28 melke kij hâlden.

Yn de floreen en stimkohieren is Tiemersma to finen by nû. 42.

Eigeners en brûkers binne west:

1640 Okke Tjebbes en broer en susster eigeners.

1698 Bonne Willems eigener. Sipke Douwes brûker.

1708 Harm Jans as curator oer Bonne Willems bern eigener. Sipke Douwes brûker.

1718 Harm Jans as curator oer Bonne Willems bern 19 pouasmiet, widd. Claes tot Kimswerp 19 pouasmiet en Teake Tiebbes tot Wommels 37 pouasmiet eigeners, Sipke Douwes brûker.

1728—1738 Thomas Annes en Teakle Tjebbes eigeners, Jan Clazes en Marten Faber brûker.

1748—1758 Burgeres Bourbon eigeners, Claes Annes brûker.

1768—1778 selde eigeners, Claes Annes en Sytse Geerts brûkers.

1788—1798 Oeke Aukes en Ruurd Rintjes Sloterdijk eigeners, Symen Piers brûker.

1818 Tjitske Jans, widd. fan Pier Simons, A. C. v. Scheltinga, widd. Heloma eigeners, Siemon Tuinstra brûker.

1828 Sybren Piers Tuinstra eigener en brûker.

1838—1848 Hyltje Boonstra en Petrus v. Asperen eigener, Marten Sipkes de Boer brûker.

1858 Hendrik Hoites Nijdam eigener, M. S. de Boer brûker. Oan't safier de floreenkohieren.

Lettere biwenners binne west:

Jitze v. d. Woude en Neeltje Noordenbos, bigjin 1900. Gerben v. Essen en Jitske Nijdam opfolge troch Gabe v. Essen en ~~TJAK~~ Zwanenburg. Dêrnei hawwe der wenne ta 1943 Sjouke v. Asma en Minke Hettinga.

1943—1953 Widd. J. R. Miedema.

1953—1960 Joh. Herm. Miedema en Greta Hylkema.

1960—1964 Herman Joh. Miedema en Hedwig Susanna Galema.

Eigener is nou widd. Lyklama Kingma.

d. H.